



徐公文集卷第五 詩五

東海徐鉉

春雪應制

繁陰連曙景瑞雪灑芳辰
勢密猶疑臘風和始覺春
縈林開玉蘂飄座裊香塵
欲識宸心悅雲謠慰兆人

進雪詩

欲使新正識有年故飄輕絮伴春還
近看瓊樹籠銀闕遠想瑤池帶玉闌
潤逐麤麤鋪綠野暖隨杯酒上朱顏
朝來花萼樓中宴數曲賡歌雅頌間

自題山亭三首

簪組非無累園林未是歸世喧長不到何必故山薇
小舫行乘月高齋卧看山退公聊自足爭敢望長閑
跋石仍臨水披襟復挂冠機心忘未得碁局與魚竿
和陳表用員外求酒
暑天頻雨亦頻晴簾外閑雲重復輕珍重一壺酬絕唱
向風遙想醉吟聲

奉和右省僕射西亭高卧作

院靜蒼苔積庭幽怪石歌蟬聲當檻急虹影向簷垂晝
漏猶憐永叢蘭未覺衰踈篁巢翡翠折葦覆鸕鷀對酒
襟懷曠園碁旨趣遲景皆隨所向物各遂其宜道與時

相會才非世所羈賦詩貽座客秋事爾何悲

憶新塗金觴池寄孟賓于員外

往年塗水金駐行軒引得清流似月圓自有谿光還碧甃
不勞人力遞金船潤滋苔蘚欺茵席聲入杉松當管絃
珍重詩人頻管領莫教塵吐咽潺潺

右省僕射後湖亭閑宴鉉以宿直先歸賦詩留
獻

湖上一陽生虛亭啟高宴楓林烟際出白鳥波心見主
人忘貴達座客容疵賤獨慙殘照催歸宿明光殿

送孟賓于員外還新塗金

暫來城闕不從容却佩銀魚隱玉峯雙澗水邊歌醉石
九仙臺下聽風松題詩翠壁稱逋客采藥春畦狎老農
野鶴乘軒雲出岫不知何日再相逢

孟君別後相續寄書作此酬之

多病怯煩暑短才憂近職跂足北牕風遙懷浩無極故
人易成別詩句空相憶尺素寄天涯淦江秋水色

納后夕侍宴

天上軒星正雲間湛露垂禮容過渭水宴喜勝瑤池彩
霧籠花燭升龍肅羽儀君臣歡樂日文物盛明時簾捲
銀河轉香凝玉漏遲華封傾祝意觴酒與聲詩

又三絕

時平物茂歲功成重翟排雲到玉京四海未知春色至
今宵先入九重城

銀燭金爐禁漏移月輪初照萬年枝造舟已似文王事
卜世應同八百期

漢主承乾帝道光天家花燭宴昭陽天衣盛禮如金屋
彩筆分題似柏梁

北苑侍宴雜詠詩

勁節生宮苑虛心奉豫遊自然名價重不羨渭川侯

細韻風中遠寒清雪後濃繁陰堪避雨効用待東風

水

碧草垂低岸東風起細波橫汾從遊宴何謝到天河

昨朝纔解凍今日又開花帝力無人識誰知玩物華

細麗披金彩氤氳散遠馨汎杯頻奉賜緣解制顏齡

柳枝詞十首 座中應制

金馬辭臣賦小詩梨園弟子唱新詞君恩還似東風意

先入靈和蜀柳枝

百草千花共待春綠楊顏色最驚人天邊雨露年年在

上苑芳華歲歲新

長愛龍池二月時氤氳金線弄春姿假饒葉落枝空後

更有梨園笛裏吹

綠水成文柳帶搖東風初到不鳴條龍舟欲過偏留戀

萬縷輕絲拂御橋

百尺長條婉麴塵詩題不盡畫難真憑君折向人間種

還似君恩處處春

風暖雲開晚照明翠條深映鳳凰城人間欲識靈和態

餘倚首卷五

三

三

三

三

聽取新詞玉管聲
醉折垂楊唱柳枝
金城三月走金羈
年年為愛新條好
不覺蒼華也似絲

新春花柳競芳姿
偏愛垂楊拂地枝
天子偏教詞客賦
宮中要唱洞簫詞

凝碧池頭蘸翠漣
鳳凰樓畔簇晴煙
新詞欲詠知難詠
說與雙成入管絃

侍從甘泉與未央
移舟偏要近垂楊
櫻桃未綻梅花老
折得柔條百尺長

奉和宮傅相公懷舊見寄四十韻

謝傅功成德望全
鸞臺初下正蕭然
搏風乍息三千里
感舊重懷四十年
西掖新官同賈馬
南朝興運似開天
文辭職業分工拙
流輩班資讓後先
每愧陋容勞刻畫
長慙頑石費彫鐫
晨趨綸掖吟春永
夕會精廬待月圓
立馬有時同草詔
聯鑣幾處共成篇
閑歌柳葉翻新曲
醉詠桃花促綺筵
少壯况逢時世好
經過寧慮歲華遷
雲龍得路須騰躍
社櫟非材合棄捐
再謁湘江猶是幸
兩還宣室竟何緣
已知瑕玷勞磨瑩
又得官司重接連
聽漏分宵趨建禮
從遊同台赴甘泉
雲開閭闔分臺殿
風過華林重管絃
行止不離宮仗影
衣裾嘗惹御爐烟

師資稷契論中禮依止山公典小銓多謝天波垂赤管
敢教晨景過華磚翺飛附驥方經遠巨楫垂風遂濟川
玉燭調時鈞軸正台階平處德星懸巖廊禮絕威容肅
布素情深友好偏長擬營巢安大廈忽驚操鉞領中權
吳門日麗龍銜節京口沙晴鷁畫船蓋代名高方赫赫
戀恩心切更乾乾袁安辭氣忠仍懇吳漢精誠直且專
却許丘明師紀傳更容疏廣奉周旋朱門自得施行馬
厚祿何妨食萬錢密疏尚應勞獻替清談唯見論空玄
東山妓樂供閑步北牖風涼足晏眠玄武湖邊林隱見
五城橋下棹回泓曾移苑樹開紅藥新鑿家池種白蓮

不遣前騶妨野逸別尋逋客互招筵棊枰寂靜陳虛閣
詩筆沉吟劈彩牋往事偶來春夢裏閑愁因動落花前
青雲舊侶嗟誰在白首親情倍見憐盡日凝思殊悵望
一章追叙信精研韶顏莫與年爭競世慮須憑道節宣
幸喜書生為將相定由陰德致神仙羊公剩有登臨興
尚子都無嫁娶牽退象天山鎮浮競起為霖雨潤原田
從容自保君臣契何必扁舟始是賢

相公垂覽和詩復貽長句輒次來韻

西院春歸道思深披衣閑聽暝猿吟鋪陳政事留黃閣
偃息神機在素琴玉柄暫時踈末座瑤華頻復惠清音

開晴便作東山約共賞烟霞放曠心

九日落星山登高

秋暮天高稻穰成落星山上會諸賓
黃花汎酒依流俗白髮滿頭思古人
巖影晚看雲出岫湖光逢見客垂綸
風煙不改年長度終待林泉老此身

十日和張少監

重陽高會古平臺吟徧秋光始下來
黃菊後期香未減新詩捧得眼還開
每因佳節知身老却憶前歡似夢迴
且喜清時屢行樂是非名利盡悠哉

御筵送鄧王

禁裏秋光似水清林煙池影共離情
暫移黃閣只三載却望紫垣都數程
滿座清風天子送隨車甘雨迎鄰人迎
綺霞閣上詩題在從此還應有頌聲

和張少監晚菊

憶共庭蘭倚砌栽柔條輕吹獨依隈
自知佳節終堪賞為惜流光未忍開
采擷也須盈掌握馨香還解滿樽罍
今朝旬假猶無事更好登臨汎一杯

送馮侍郎

聞君竹馬戲毗陵誰道觀風自六卿
今日聲名光舊物共看旌旆擁書生
斬蛟橋下谿煙碧射虎亭邊草路清

應念筵中倍離恨老來偏重十年兄

又絕句寄題毗陵驛

曾持使節駐毗陵長與州人有舊情為向驛橋風月道
舍人髭鬢白千莖

陳侍郎宅觀花燭

今夜銀河萬里秋人言織女嫁牽牛珮聲寥亮和金奏
燭影熒煌映玉鈎座客亦從天子賜更籌須為主人留
世間盛事君知否朝下鸞臺夕鳳樓

送蕭尚書致仕歸廬陵

江海分飛二十春重論前事不堪聞主憂臣辱誰非我

曲突徙薪唯有君金紫滿身皆外物雪霜垂領更離羣
鶴歸華表望不盡玉筍山頭多白雲

賦得秋江晚照

落日照平流晴空萬里秋輕明動楓葉點的亂沙鷗
網魚梁靜蘆簷簷稻穗收不教行樂倦冉冉下城樓

奉和子龍太監與舍弟贈答之什

石渠東觀兩優賢明主知臣豈偶然鴛鴦分行皆接武
金蘭同好共忘年懷恩未遂林泉約竊位空慙組綬懸
多少深情知不盡好音相慰強成篇

史館庭梅見其毫末歷載三十今已半枯嘗僚

諸公唯相公與鉉在耳觀物興感率成短篇
謹書獻上伏惟垂覽

東觀婆婆樹會憐甲坼時繁英共攀折芳歲幾推移往
事皆陳迹清香亦暗衰相看宜自喜雙鬢合垂絲

鼎臣學士侍郎以東館庭梅昔翰苑之毫末今
復半枯向時同寮零落都盡素髮垂領茲唯

二人感舊傷懷發於吟咏惠然好我不能無
言輒次來韻攀和 悅

憶見萌芽日還憐合抱時舊歡如夢想物態暗還移素
豔今無幾朱顏亦自衰樹將人共老何暇更悲絲

再次前韻代梅答

託植經多稔頃筓向盛時枝條雖已改情分不曾移莫
訝堦前老還同鏡裏衰更應憐墮葉殘吹挂蟲絲

太傅相公深感庭梅再成絕唱曲垂借示倍認
知憐謹用舊韻攀和

禁省繁華地含芳自一時雪英開復落紅藥植還移謂
為翰林又靜想分今昔頻吟歎盛衰多情共如此爭免
為史館 髮成絲

太傅相公以東觀庭梅西垣舊植昔陪盛賞今
獨家兄唱和之餘俾令攀和輒依本韻伏媿

斐然 錯

靜對含章樹

漢有含章樹下樹

閑思共賞時香隨荀令在根異

武昌移物性雖搖落人心豈戀衰變唱訓勝笛曲來往韻

朱絲

鼎臣學士侍郎楚金舍人學士以再傷庭梅詩

同垂寵和清絕感歎情致俱深因成四十字

陳謝 悅

人物同遷謝重成念舊悲連華得瓊玖合奏發塤篪餘

枿雖無取殘芳尚獲知問君何所似珍重杜秋詩

太傅相公以庭梅二篇許舍弟同賦再迂藻思

曲有虛稱謹依韻奉和庶申感謝

舊春終無替流光自足悲攀條感花萼和曲許塤篪餘

會成春夢何人更已知緣情聊借喻爭敢道言詩

太傅相公與家兄梅花詠唱許綴末篇再賜新

詩俯光拙句謹奉清韻用感鈞私伏惟采覽

錯

重歎梅花落非關寒

寒

笛悲論文叨接萼末曲媿吹篪詩毛

云仲氏吹篪

枝逐清風動香因白雪知陶鈞敷友悌更賦邵

公詩

和鍾太監汎舟同游見示

潮溝橫趣北山阿一月三游未是多老去交親難暫捨
閑中滋味更無過谿橋樹映行人渡村徑風飄牧豎歌
孤擢亂流偏有興滿川晴日弄微波

又和游光睦院

寺門山水際清淺照孱顏客擢晚維岸僧房猶揜闕日
華穿竹靜雲影過堦閑箕踞一長嘯忘懷物我間

和張少監舟中望蔣山

谿路向還背前山高復重紛披紅葉樹間闕白雲峯盡
日慵移擢何年醉倚松自知閑未得不敢笑周顛

御札

新酒初熟偶與鄭王諸公開嘗於清宴堂廡之間既覽
秋物復矚霜牋因賦茱萸一題以遣此時之興卿鴻才
敏思不可獨醒宜應急徵同賦前旨

茱萸詩

翰林學士臣徐鉉進

萬物慶西成茱萸獨擅名房排紅結小香透夾衣輕宿
露霑猶重朝陽照更明長和菊花酒高宴奉西清

奉和御製茱萸

臺畔西風御果新芳香精彩麗蕭辰柔條細葉粧治好
紫蒂^葉紅芳點綴勻幾朵得陪天上宴千株長作洞中春
今朝聖藻偏流詠黃菊無由更敢鄰

今蒙恩賜酒奉旨令醉進詩以謝

明光殿裏夜迢迢多病逢秋自寂寥臣以病戒酒多時蠟炬乍

傳丹鳳詔御題初認白雲謠今宵幸識衢樽味明日知

傳入閣朝為感君恩判一醉不煩辛苦解金貂

秋日汎舟賦蘋花

素豔擁行舟清香覆碧流遠煙分的的輕浪汎悠悠雨

歇平湖滿風涼運續秋今朝流詠處即是白蘋洲

題梁王舊園

梁王舊館枕潮溝共引垂藤繫小舟樹倚荒臺風淅淅

草埋歌石雨修修門前不見鄒枚醉池上時聞鴈鷺愁

節士逢秋多感激不須頻向此中游

奉詔度支陳員外

古來賢達士馳騫唯羣書非禮誓弗習違道無與居儒

家若迂濶遂將世情踈吾友嗣世德古風藹有餘幸遇

漢文皇握蘭佩金魚俯視長沙賦恻恻將焉如

明道人歸西林求題院額作此送之

昔從岐陽狩簪纓滿翠微十年勞我夢今日送師歸曳

尾龜應樂乘軒鶴漫肥含情題小篆將去挂巖扉

送宣州江判官

憲署游從阻平臺道路賒喜君馳後乘於此會仙槎緩

酌遲飛蓋微吟望綺霞相迎在春渚暫別莫咨嗟

北使還襄邑道中作 九月三十日

九月三十日獨行梁宋道河流激似飛林葉翻如掃程
途苦晝短野迥知寒早還家亦不閑要且還家了

禁中新月

今夕拜新月沉沉禁署中玉繩踈間彩金掌靜無風節
換知身老時平見歲功吟看北墀暝蘭燼墜微紅

觀吉王花燭

王門嘉禮萬人觀况是新承置醴歡花燭喧闐丞相府
星辰搖動遠游冠歌聲暫闕聞宮漏雲影初開見露盤

帝里佳期頻賦頌長留故事在金鑾

暮賸賦詩輸劉起居 與

刻燭知無取爭先業未精本圖忘物我何必計輸贏賸
豎終規利焚囊亦近名不如相視笑高詠兩三聲

春盡日游後湖贈劉起居 劉時方
燒藥

今朝湖上送春歸萬頃澄波照白鬢笑折殘花勸君酒
金丹成熟是何時

送察院李侍御史廬陵因寄孟員外

繡衣乘驛急如星山水何妨寄野情肯向九仙臺下歇
閑聽孟叟醉吟聲

國朝五後湖訪古各賦一題得西邸

南朝藩閫地八友舊招尋事往山光在春情晴草色深曲

池魚自樂叢桂鳥頻吟今日中興運猶懷翰墨林

金丹送德邁道人之豫章

禪靈橋畔落殘花橋上離情對日斜顧我乘軒慙組綬
羨師飛錫指煙霞樓中西嶺真君宅門外南州處士家
莫道空談便無事碧雲詩思更無涯

送陳秘監歸泉州

風滿潮溝木葉飛水邊行客駐驂騑三朝恩澤馮唐老
萬里鄉關賀監歸世路窮通前事遠半生談笑此心違

離歌不識高堂慶特地令人淚滿衣

又聽霓裳羽衣曲送陳君

清商一曲遠人行桃葉津頭月正明此是開元太平曲
莫教偏作別離聲

又題白鷺洲江鷗送陳君

白鷺洲邊江路斜輕鷗接翼滿平沙吾徒來送遠行客
停舟為爾長歎息酒旗漁艇兩無猜月影蘆花鎮相得
離筵一曲怨復清滿座銷魂鳥不驚人老不及水禽樂
安用虛名上麟閣同心携手今如此金鼎丹砂何寂寞
天涯後會眇難期從此又應添白鬢願君不忘分飛處

長保翩翩潔白姿

長保翩翩潔白姿
如用武時上
轉運一由
白雲
...

徐公文集卷第五

徐公文集卷第六 制一

保寧王制

南昌王制

張居詠制

馬希崇舒州節度使制

馮延巳加特進制

林仁肇浙西節度使制

鄧王加司空制

上太后尊號制

徐運授太子太保制

朱業江州節度使制

朱業宣州節度使制

劉從効檢校太師制

嚴續除司空制

改封江王制

謝斤加特進制

鄭王加元帥制

朱業加中書令制

馬在貴加官制

游簡言平章事制

保寧王制

門下昔先王聰明時憲文質載周親親之義莫之或改
乃知封建之重宗社攸賴友愛之美風教攸先寅奉舊
章敢忘循舉二十弟某稟質冲粹慎德孝恭出言有章
好學不倦故我文考慈訓備隆而能踐修嘉猷惠迪前
哲卓爾令器時惟老成粵予眇冲肇當纘服賴貽謀之
啟後仰垂鑒之在天尚念多艱懼弗克荷是用睦懿親
以佑涼德班宗彛以懷萬邦錫爾以山川表爾以車服

師長之任申而寵之敦叙之恩於是乎在於戲苴茅侯
社禮莫縟焉連華棣萼親莫昵焉履信思順可以無悔
尊師重道事以多聞盡愛敬以奉親顏極惠和以厚宗
室勿恍勿墮有初有終服我訓詞永光懿烈可

南昌王制

門下昔西周之分陝服則曰風聲所存南朝之治揚州
則曰本根攸寄非親賢碩望不足以表東夏非輔相重
地不足以副具瞻天下為公百王不易肆予敷命匪敢
有私長子某敦信厚之風秉孝恭之德允迪前烈率由
生知自剖麟符徃綏淮甸尊敬師保奉行詔條有所問

而不干知為善之最樂東楚之俗向風而安時以為能
朕亦自慰夫陟明賞善有國大典苟得其所雖親何嫌
是用特就留臺罷開相府崇貴之數儀制存焉噫為政
無他勤則有繼舉德甚易終之實難無以安佚自居而
忘夙夜之戒無以驕貴自負而忽藥石之言治亂盛敗
則有先聖之遺經憲章文物則有中朝之成式諮訪佩
服身先行之敬哉慎哉無忝多訓可

張居詠制

門下昔在先王任賢尚齒出將入相所以任賢也尊師
重傅所以尚齒也况乎擇藩屏之寄膺輔導之求高步

承華誕揚師訓克堪其選我有人焉某負貞幹之材稟
純厚之德亟更庶尹歷事累朝昇元始基賴其獻納故
陟鸞臺之位爰立作相保大踰歲籍其經懍懷故委龍節
之權受賑之社懋乃嘉績叶于朕心殿邦政成輯瑞來
覲方圖位著爰得僉諧而昔自故相已嘗為保重煩耆
德俾傳東朝尊敬之儀典章斯在噫昔者叔孫疏廣善
於其職克繼來躅可不慎哉勉著嘉猷以副時望可

撫州節度使馬希崇除舒州節度使制

門下姬周同德曹叔封於王畿炎漢功臣楊僕耻居關
外是知藩翰之重所寄必同遠近之差以斯為寵我有

成命爾其敬聽某識度恢弘風猷茂遠家勲盖世不怙
貴以驕人多難荐臻每忘身而濟物智能適變仁足元
宗來庭不俟於七旬保境豈徒于五郡劉總舉全燕之
地弘正輸雄魏之邦故實攸存懋章何怯是用加之飲
賜尊以上公陟負璽之崇資委建牙於列鎮虛襟而見
前席與談言語有章威儀可則既叶鼓予之望且堅戀
關之心藹爾誠明形于表疏愈歎忠勤之操宜更節制
之權而永泰全軍舒庸舊國地望無慙于汝水封疆密
邇于王城用諧日近之言尚資河潤之福俾迴新命徃
受中權於戲大義昭彰朝恩渙汗千里之地可以觀政

三軍之帥可以圖功永樹風聲無忘多訓可

太弟太保馮延巳落起復加特進制

門下爵賞之行憲章斯在急於務則適其變終其事則
歸于禮將軍重位足以奪孝子之情特進崇班自昔冠
諸侯之上申為懋典允屬公才具官馮延巳儒雅積中
機神應物風雲夙契魚水冥符處多士之朝副具瞻之
望及移相府出鎮臨川封境綏懷聲猷茂遠頃集蓼莪
之痛俯從金革之權露冕有誠輯瑞來覲疇咨舊德保
佑東朝比疏傅之在前允諧擬議類魯公之拜後適就
變除俾進崇階庶申優寵於戲將相之重資爾以惟聖

儲兩之尊緊爾以成德知人則哲予用弗疑勉揚令圖
無忝多訓可落起復冠軍大將軍加特進餘並如故

林仁肇浙西節度使制

門下建侯樹屏有國之敬先崇德報功百王之所共斯
為令典予敢忘之鎮海軍節度浙江西道觀察等使留
後金紫光祿大夫檢校太傅濟南縣開國伯食邑七百
戶林仁肇稟此星芒鬱為時幹鼓鼙之氣指勅敵而愈
高金石之心因時艱而益壯故能灼殊功於南部夷多
壘於東門元戎所行績用昭著及摠留務于浙之西成
師著無犯之威察俗有惟清之化屹爾京口殷然長城

予惟汝嘉俾正藩守因爾才略樹之風聲雄師大邦所
以屏王室尊官盛典所以懋官成惟惠惟和有嚴有翼
使予無東顧之慮者繫其賴焉克堅一心以永百祿可
依前檢校太傅兼御史大夫使持節都督潤州諸軍事
潤州刺史充鎮海軍節度使浙江西道管内營田觀察
處置等使功臣散官勳封如後

紀國公封鄧王加司空制

門下宗子維城良臣維聖故有王社之數鼎司之權親
親賢賢古之大訓也我有成命時維至公第七子某識
度淹通器質清粹就傳之歲威儀不慙出閭已來聞望

所著向由邦政入踐中樞內形將順之規外盡彌綸之
業人知親附俗待和平邦家之基斯實攸賴今六駢巡
守萬乘啓行方資扈蹕之勤宜有酬庸之典畫南陽而
錫壤掌邦土以命官併加馭貴之資益峻具瞻之望於
戲義極君父愛敬之道兼為任綜文武施張之政存焉
爾其佩服前訓咨詢舊德勿驕勿惰有初有終永樹風
聲以保元吉

上太后尊號制

門下膺昊穹之眷荷宗祏之重何嘗不嚴奉慈訓聿循
孝理所以化成天下弘濟多艱親親尊尊教之大者也

况沉潛之德丕顯于國風輔佐之勤光昭於五業今遺
恩累洽靈鑒在天俾予小子恭踐大寶思弘任姒之烈
紹恢三五之基彝章盛典敢忘祇奉宜上大行國主皇
后尊號為太后

太子少傅徐運授太子太保制

門下崇德尚賢推恩錄舊茲惟令典允屬時英予以眇
躬嗣膺丕業威藩之望羽翼之恩敢忘寵章用光師道
某清直稟氣忠厚為資實戚里之所宗歷累朝而見重
敬慎即保家之主恭勤無出位之思爰自京口臨藩克
負師律鸞臺作相足厚時風留侯旋務於退身疏受更

聞於稱職純誠益著雅望攸高昨者預奉綴衣導揚末
命忠貞以濟典禮無違願惟冲人懼德弗嗣當此承祧
之日益堅重傳之懷是用就改崇資仍加食賦於戲班
崇一品秩視三師苟非賢臣孰克臻此永期納誨無替
令猷可

朱業江州節度使制

門下古者諸侯之賢入為卿士上公之罷出為方伯故
中外之任踐更攸宜我有勲臣咸曰名將藩維宿衛夾
輔冲人肆予仰成是用申告某家傳武畧天賦純誠名
因勇聞位以材致周旋數紀佐佑累朝由裨將以統元

戎勲勞滋茂自百城而登連帥聲政洽聞罷益盛而若
驚位益高而愈讓予纂服之始駿奔來朝且堅戀闕之
心因處周廬之任忠貞彌固夙夜惟寅輦下肅清時乃
之力永言舊德豈忘予懷會九江元侯入奉朝任中流
之寄非賢不居是用輟蘭綺之權付金符之重徃分巨
屏更佇殊庸噫簡師旅以壯軍聲明紀律以宣庶政可
畏可愛富之教之是汝所長無替前効陟明有典厥惟
欽哉可

朱業宣州節度使制

門下車服之寵所以報功藩閫之權所以觀政茲為令

典允屬信臣某智勇推高忠貞特立秉武經而致用服
戎政以居多誠悃洞然終始一揆及分符出守持節主
留恩信並行詔條畢舉肅連營而無犯視赤子以如傷
所臨之方去思仍在向鍾多難入衛京師憂國忘家令
行禁止羣情自固戎事以寧肆予仰成時乃之力今疆
場俯靜蒸黎未康宣城奧區國家巨屏方當謀帥是用
策勲資果毅以壯先聲假惠和而蘇疲俗付爾節鉞往
鎮撫之惟爾慈儉足以安民剛正足以行法必當望風
自理投刃皆虛宜弘寬大之規以集中庸之德勉茲具
美求永振嘉猷可

泉州節度使劉從劾檢校太師制
門下望高於朝則享師保之任惠加於物則進土田之
封所以啟佑冲人藩屏王室者也我有寵數屬於元侯
某山岳儲精星芒秉異挺全才而應用激大義以致身
而自際會先朝奮揚奇策靜一方之多難越萬里以來
庭故得倚作藩宣誓之帶礪而能息威洽著紀律修明
戎政有經理聲日遠黎獻有不欺之頌朝廷無南顧之
憂茂績忠規古難其比粵予眇質嗣德弗明賴我友邦
越乃賢帥推誠翼戴克荷景靈渙汗之恩惟恐不至是
用增以井賦崇為太師美號峻階併伸殊渥噫乞言之

禮可以觀德殿邦之寄可以樹勲勉揚令圖永錫繁祉
可也贊朝輔政賢廉景靈廟下之恩非然不至是
右揆嚴續除司空兼門下侍郎平章事制文
門下天作司牧必生丞弼非君臣同體道則不明非律
呂交感功則不濟粵子眇質負荷景靈不有時賢豈
多難敬若先意疇茲舊臣某純粹炳靈惠和成性襲
鼎之慶連肺腑之親歷奉累朝亟更庶尹憂國家之事
知無不為經夷險之間中立不倚言必由於忠信行必
自於誠明勞而弗矜謙以自牧先朝鑒其誠志任以腹
心須當巡守之初俾貳主留之寄盡規竭慮夜思晝行

京輔以寧時乃之力及奉揚末命以佑冲人送往事居
禮無違者忠勲茂績人無間然今二后在天萬物思理
予方乃眷子亦具瞻是用命作司空倚為左相兼國史
樞機之任進升階食賦之資豈曰寵章是同憂責嗚呼
受遺作弼厥惟艱哉爾其崇遠大之謨布簡寬之政詢
箴諫之士塞便佞之言滿假自賢則其智益蔽虛懷接
物則其猷益光念茲在茲以底於道可

信王改封江王加中書令制

門下唐堯之聖也既以序九族為先漢祖之隆也亦以
守四方在念矧予小子弗堪多難實賴羣臣共康蒸民

粵有賢侯亦在諸父庸勲表德敢或愛焉第二十叔某
天賦機神生知禮樂肇開朱邸則孝敬之道升聞出建
齋壇則威和之風遠振况五嶺之際俗雜地雄吏服其
明民安其教煦如冬日隱若長城孤以不明祇奉王御名
咨乃庶尹至于友邦師保之規既自家而形國蓼蕭之
澤當由親而及遠是用正左相之位崇三司之儀增賦
進封併伸寵數於戲昔我文考並建懿親藩屏所繫社
稷是衛燕翼之旨可不勉歟敬佇嘉猷以永繁祉可

謝斥策加特進階增食邑

門下王者均慶推恩無遠弗及矧有舊德居然將臣方

申求舊之懷豈怯疇庸之典某素推勇氣夙負壯圖立
功旗鼓之間發跡風雲之會出分符竹入守闕防翼衛
天門董齊蘭錡咸著在公之績可觀適用之材享此期
頤保茲優逸臻富壽之福全終始之名比之古人不可
多得孤以眇質嗣守慶基方資無改之規式重後凋之
節俾升階序仍進戶封於戲二品崇階資三朝貴任人臣
寵祿何以過斯勉荷朝恩永揚令問可

鄭王加元帥江寧尹制

門下睦親尊賢王者之盛業也中台上將有國之重任
也是必疇咨公議稽若前經舉而行之謂之令典我有

受弟時惟宗英論道經邦勲德滋茂肆予有命允叶厥
中某挺命世之才秉生知之哲機神穎邁器宇冲深自
寶玉分封緇衣授職內蘊清明之德外宣寅亮之功持
謙下之資以親附百姓體儉勤之節以表率時風學問
該通每諮詢而自益忠誠孝悌常將順以無違昔者三
后叶心十亂同德允茲古義非爾而誰粵予眇躬惠迪
先訓獲守大業沆臻小康實繫手足之賢以集股肱之
寄無德不報雖親何嫌是用誕舉渥恩就加名數夫元
帥者民之司命中樞者國之宗臣尹京所以表則四方
增封所以藩輔王室毗倚之重何以加斯於戲義兼國

家權摠文武動靜之際治亂繫焉所先者在乎弼諧所
慎者在乎聽受清如止水故是非之說不可欺平如懸
衡故善惡之徵不能惑有犯無隱非好異也不違如愚
非苟合也惟公是務惟道是從所務必老成所親必端
士服茲多訓永樹英聲可

朱業加中書令宣州節度使制

門下予嘗顧藩屏之重思黎獻之康故使折衝之威迭
行於封畧惠和之化普及於方州既報政之屢聞乃改
轅而敷寵咨爾賢帥聽吾話言某武毅致身忠厚成性
踐更事任昭著勲庸倚若金湯誓之帶礪自持使節出

鎮中流恢簡易之風立嚴明之令仁而有斷吏不敢欺
故使萬井阜安連營輯睦藹爾殿邦之績叶予進律之
文率是通才何適不可予以宣城列鎮旬服粵區久闕
元戎未享王化藉爾有成之政副我共理之懷右相之
宗宰司所重申為殊獎以極朝恩於戲有惠于民有功
於國中台貴位累鎮劇權苟非純誠何以臻此爾尚守
益恭之節勵匪懈之心永懋嘉猷以光時望

馬在貴加官制

門下盡忠于國者其報深有勞於事者其澤厚方切念
功之義仍當均慶之初不有寵章孰先懋典馬某深沉

有勇質重寡言少推學劍之能早識擇君之舉自策名
旗鼓受任疆場履險身先有功不伐向分符竹實制要
衝化行於富庶之時節著于艱難之際純誠懿績時論
多之入摠禁營遂成優秩富壽之福無闕敬慎之風愈
高予惟汝嘉思有以勸屬此推恩之際俾升掌武之資
噫忠勲既明寵祿亦至終始之義今古所高勉揚令猷
以享元吉

游簡言左僕射平章事制

門下昔在明王膺圖嗣統雖復格天光表繼文下武猶
曰實相以濟又曰克艱厥臣矧惟寡昧疇咨庶尹若乃

徐麟卷六
承弼之重毗倚之隆詢於具瞻敢或輕授游某世濟文
雅挺生公器中興之始即為辭臣重熙在運亟更近署
忠為令德實浮於名藹然直聲允洽時望先皇帝省方
展義分命羣司藉爾重臣輔予小子直躬無避正辭不
諂翊從行闕克申其勞至於受命交矢之間抗節履危
之際由義以濟知無不為此皆古之所以為艱今之所
以嘉尚者也間歲出於獨斷命長南宮議者但高其盡
公之誠未許其理劇之用遂能正身而令當官不回厲
風霜之威以糾其慢堅夙夜之節以率其勤請托不行
紀綱自舉羣議由是咸伏六職以之孔修風雨不渝始

終一致實為國器想見古人而躬親簿領之間遽成勞
勩從容廟堂之上未盡謀猷疇庸之典予所多愧是用
命作左相陟茲鸞臺進金紫之崇階典圖書之秘府勲
爵并賦併示寵名於戲釋細務足以導節宣之和叅大
政足以暢彌綸之業緊爾致君之効成我知臣之明往
惟欽哉無假多訓可

徐公文集卷第六

郭... 趙... 王... 李... 高... 魏... 王... 高... 李...

徐公文集卷第七

東海徐鉉

李_斥明御史大夫制 宗齊立知尚書省制

劉崇俊起復制 馮延魯江都少尹制

王彥儔加階制 李_斥明舒州刺史制

趙丕御史中丞制 陳襲制

杜昌業江州制 招討妖賊制

魏王宣州大都督制

王崇文等並本州觀察使制

高逸休壽州司馬制 李萼節度副使制

馮延巳兼起居郎閤居常兼起居舍人制

王仲連朱崇楷等制 查文道知雜制

張義方勤政殿學士制

劉彥貞觀察使制 外祖母追封制

刁紹工部尚書制 張義方左常侍制

李貽業宗正卿制 陳繼善工部侍郎制

蕭儼祠部郎中制 陳景進工部侍郎制

李_斥明御史大夫制

勅御史所職實為紀綱百官之邪得以糾正衆目不理
得以舉明使朝廷凜然因懈於位茲朕之攸賴而和庶

政也向者治刑不暇官業靡申遂用省其訊鞠之煩委

以澄清之寄庶循理本諒在得人通議大夫守吏部尚

書柱國賜紫金魚佩隴西縣開國子食邑五百戶李_斥

明學術優深德望清重可副丞相以鎮時風中散大夫

守右常侍判御史臺事柱國賜紫金魚袋趙丕自掌憲

司克勤於職而侍從之列朝夕論思期于弼違宜在專

任今以庶獄移從理官可歸騎省以備顧問各踐乃位

允期懋功_斥明可御史大夫丕可守本官罷_{臺事}

宋齊_止知尚書省制

勅兩掖南宮樞機之地也元台上公股肱之寄也况親

賢在位中外具瞻式叙彝倫爰申明命夫真宰之重大
政咸歸出納王言固當綜錄侍中壽王其向兼南省未
叶舊章宜罷判尚書省便領中書門下兩省事太保齊
正雖道在經邦方資納誨而事殷會府兼藉允釐可知
尚書省事大元帥齊王摠納百揆以負萬邦凡曰謨猷
悉闕獻替其三省事並取齊王叅決朕允思恭已以荷
景靈用一國之才敢辭則哲成天下之務庶叶無為方
俟沃心豈勞多訓

劉崇俊起復制

勅并時啓運功臣威邊將軍濠州都團練觀察處置等

使光祿大夫檢校太傅使持節濠州諸軍事守濠州刺
史渦口兩城使兼御史大夫上柱國彭城縣開國子食
邑五百戶劉崇俊濠上觀風克昭祖服光祿大夫檢校
太保持節常州諸軍事常州刺史兼御史大夫上柱國
劉佑晉陵守土允茂政經而皆夙練軍聲習知邊要方
深朝寄遽屬內艱未言護塞之權宜舉墨綬之制俾加
寵命改授階資勉抑孝心以從王事並可起復雲麾將
軍餘如故

馮延魯江都少尹制

勅朝議郎行尚書虞部員外郎武騎尉賜緋魚袋馮延

魯頃者尹縣留都首變田制克勤于事以利于人自歸
朝行已踰周歲如聞衆庶未甚樂成矧彼浩穰所宜均
一是用假爾亞尹徃畢舊功其在條理得中厚薄無撓
俾乃比屋咸遂所安止於刑讞之繁亦以公平為用務
令稱職無忝加恩可以本官判江都少尹公事

王彥儔加階制

勅王者旌董戎之功重殿邦之任疏寵之命因事有加
所以勸能而佇効也佐時衛聖功臣建威將軍康化軍
節度池州觀察處置等使起復雲麾將軍檢校太尉兼
侍中使持節池州諸軍事池州刺史上柱國太原郡開

國侯食邑二千戶王彥儔作鎮方隅克揚威信師謀不
撓庶政有常肅爾先聲宣我朝命向者起于哀制授以
崇階禮適就於變除寄方隆於藩屏俾崇增邑式示推
恩勉揚令圖無替王績可光祿大夫加食邑一千戶餘
如故

李旰明舒州刺史制

勅通議大夫守御史大夫柱國賜紫金魚袋隴西縣開
國子食邑五百戶李旰明向緣時望命長憲臺既歷歲
時亦聞敬慎方佇茂績以光大猷遠覩拜章固辭重位
俾全罷過宜輟準繩尚賴分憂無忘守節可檢校司徒

兼御史大夫使持節舒州諸軍事守舒州刺史充本州
團練使餘散官賜邑如故

趙丕御史中丞制

勅朕以御史未理庶政靡清思得良臣副吾慎選中散
大夫守右散騎常侍柱國賜紫金魚袋天水縣開國子
食邑五百戶趙丕再履憲署欽若攸司迭為侍臣所予
不及俾授格心之寄宜膺獨坐之權夫才識兼通然後
能得大體公正無黨然後能肅百司糾正失中則紀綱
撓顧避不言則職業隳爾其欽哉無辱朕命可御史中
丞餘官勲賜爵邑如故

陳襄制

勅出身事主忠之効也以年致政古之制也淳風將振
斯道復行朕用嘉焉宜示優寵宣徽使某官陳襄以敬
慎之操俊乂之才輔予潛九之初叶我司總之寄出納
惟允佐佑盡規勤勞王家數紀於是未念耆德方注虛
懷遽從知退之言亟有懸車之請雖面諭難抑豈舊功
可忘而司衛列卿秩崇務簡俾退辭近侍猶在立朝勉
迴高尚之心式厚君臣之義可衛尉卿

杜昌業江州制

勅十連之帥百城之長藩屏王室其揆一也隨時省置

何常之有焉朕祇荷慶基懋循古訓迭用舊德以頒詔
條交修予違踐更爾位肆曰大慶式舉朝章金紫光祿
大夫上柱國京兆縣開國子食邑五百戶杜昌業始以
明敏肅恭服勞近畧出納惟允固慎無違先帝用能委
之邦政明九伐以恢王畧堅一心以迪大猷六事允諧
時乃之用將圖爾効且盡其才朕以中流之寄九江為
重控五嶺之衝要鎮百蠻之驛騷屬予相臣入摠樞務
惟爾公望克嗣其勲是用輟夏官之崇膺外臺之職尚
虛使節以便理戎其往慎乃攸終遵我成憲簡易以申
令恩信以即師惟惠惟忠無忝朕命依前檢校太保兼

御史大夫使持節江州諸軍事江州刺史本州團練觀
察使散官勲如故

招討妖賊制

朕聞先王之靜人也四夷咸賓尚先慎德之誠一夫不
獲則軫納隍之心是故導以仁聲浹之惠澤猶不可化
遂威有刑昨者^嶺領表遺^曠聚為寇盜違其上命犯彼戰
鋒而敢乘我國哀伺我邊隙侵軼我封部誘惑我黔黎
保據谿山肆為剽掠朕以肇膺丕業先洽德音矧彼狂
徒皆吾赤子弗忍盡殺冀其自新所以雖命師徒且令
招撫而克愚不革結聚愈繁暴害吏民攻圍縣邑一至

於此其能父子國有常刑吾又何愛仍聞衆軍致討累
有殺傷平人無辜曝骨于野興言及此永惻朕心况常
賦及期三農失業特申矜惜更示懷來虔州今年應屬
省租稅並可放免仍委諸縣長吏安存編戶宣示國恩
防護警巡勿令擾動妖賊張茂賢首為劫盜罪在難容
若能束身歸降亦與洗滌收錄如聞命之後因循未賓
即令招撫諸軍分路進討如所在百姓及徒黨中有能
擒斬茂賢者不計有官無官並賜三品賞錢一萬貫莊
一區并已分產業並永放苗稅差役傳之子孫此恩不
改若能同心計畫及數內或擒獲得稱王稱統軍軍使

之屬并次第首級止於一隊一寨頭領者即約此例等
降優賞放免苗稅差役或能自出身歸投有田畝者各
令歸業仍放三年租賦無田者委本道錄奏各與逐便
優穩安排及重加賞賚如克惡不迴為諸軍擒獲者不
問人數即便處斬明申威信汝自擇焉諸軍將士有能
斬獲茂賢殺戮支黨官賞之制並越常規予不食言爾
宜自勵朕永惟止殺許汝悛心且妖賊等燒毀倉儲蹂
踐禾稼聚食則資糧立盡外取則穀實不收進則大軍
扼其前退則領兵掎其後况烏合之衆本不同心緩則
苟避征租急則各圖恩賞函首來獻翹足可期咨爾羣

黨等自保家鄉共思寧息與其碎身於鋒刃孰若樂業於閭里咨爾將士等各奮驍雄早成功績與其暴師於境上孰若受賞於轅門體我深懷速清邊徼布告本道咸使聞知

魏王宣州大都督制

勅惟先王體國經野建邦設都並立懿親以藩王室當畿服之地則任輔翌之重有戎昭之績乃增督護之威是以王畧恢而諸侯和矣宣城重鎮陪京之南制天險之津梁據三楚之襟帶境環千里邑聚萬民我朝以來戎寄尤切太師魏王受鉞先帝建牙是邦宣導王風董

齊師律生殖茂遂禮讓興行時惟懋功叶此時論粵朕小子懼德弗堪允孚大猷其在叔父雖師保之命已迪茂章而刺舉之名未極公望宜升大府式壯中權於戲立愛之恩予不敢怠敬保之義王其謂何勉啟乃心以底於道可升宣州為大都督府以魏王為宣州大都督府長史餘並如故仍編入冊命宣降

王崇文劉仁瞻張鈞並本州觀察使制

勅守邊之要在乎崇垣翰而重威令也任能之方在乎因善政而加寵秩也懋迪斯道時惟令猷金紫光祿大夫檢校太傅使持節吉州諸軍事守吉州刺史兼御史

大夫上柱國太原縣開國男食邑三百戶王崇文儒雅飾身威猛宣用入奉旅賁之列出申刺舉之能光祿大夫檢校太傅使持節袁州諸軍事守袁州刺史兼御史大夫上柱國劉仁瞻沉厚有謀明斷能理護塞之略歷任弗遷光祿大夫檢校太傅使持節歙州諸軍事守歙州刺史兼御史大夫上柱國清河縣開國子食邑五百戶張鈞踐履班行昭著聲聞守土之効一心靡違而皆克樹編乃勲誕揚我武協比成績勤勞王家朕以眇躬欽承鴻業實賴良將綏爰四方肆于布慶之辰而有加等之命就升使職並駕兼車仍崇馭貴之封增立將軍之

號併申寵寄尚示克終無懈乃誠以底於理陟明有典予不敢忘崇文可光祿大夫依前檢校太傅使持節吉州諸軍事守吉州刺史兼御史大夫充本路都團練觀察處置等使進封開國子食邑五百戶仍賜號威勇將軍散官勲如故仁瞻可依前檢校太傅使持節袁州諸軍事袁州刺史兼御史大夫充本州團練觀察處置等使封彭城縣開國男食邑三百戶仍賜號貞威將軍散官勲如故鈞可依前檢校太傅使持節歙州諸軍事守歙州刺史兼御史大夫充本州都團練觀察處置等使進封開國伯食邑七百戶仍賜號武威將軍散官勲如

故... 高逸休壽州司馬制... 勅朝議郎行袁州司馬賜緋魚袋高逸休立身謹行聞於朝廷負才好謙老於州縣先皇獎異錫以銀章優秩自居十數年矣其子煇秉乃直筆為吾史臣適當均慶之初先有腰金之命而愛敬之切發于中誠乞循迴授之文庶遂顯親之義辭旨懇激覽之惻然俾允所陳且成其美仍加寵秩以就懸車噫望俗舊人惟爾而已觀本朝之恢復拖紫綬以優游孝子克家耆年致養茲惟盛事足慰爾心可檢校尚書水部員外郎壽州都督府

司馬致仕賜紫金魚袋

宣州營田副使兼馬步都指揮使李萼可節度

副使罷軍職

勅王者官人之旨必褒賢能而均勞逸也列辟垂憲予弗之忘某官李萼夙負壯圖少為裨將餘勇可賈有勞不矜泗水剖符邊候寧晏宣城從帥連營輯和而將領之權久煩耆德毗贊之任未極初筵俾援尚齒之文就疏加等之命勉承朝獎無替忠誠可

駕部郎中馮延巳兼起居郎屯田郎中閻居常

兼起居舍人

勅朕凝旒端冕以臨萬邦而左右史臣執簡近侍言動得失涇記無回故布政罔不臧承化罔不若惟聖攸賴慎東難虛某官馮延巳君子之儒多聞為富發之為直氣播之為雄文某官闇居常行顧樞機學臻精博得廷臣之體多長者之言而皆踐彼周行奉予元子或奉記有翩翩之譽或躡屨多疊疊之談藹然清風叶此時望是宜兼領郎署咸躋掖垣於戲君舉必書朕敢忘于恭已無德不報爾勿怠於懋官各振公才副茲多訓可

侍御史王仲連可起居舍人監察米崇楷可右

補闕

勅朕嘗思古先哲王所以致理區中垂憲萬祀者蓋有史臣以記其過有諫官以弼其違或面諍於庭或舉書於冊故政令所及罔不化成而怠惰之心無自入矣將振斯典必求其人某官王仲連爰藉才能亟叅秩序正已而率下盡節而向公某官米崇楷早負時名尋升闈籍佩韋以臨事慎獨以修身而並服豸冠或司綱憲或立朝多按劾之奏或典刑有欽恤之心叶我懋章宜升右掖勉修官業以副簡求直筆正言無有所諱可

水部員外郎判刑部查文徽可侍御史知雜

勅秦漢以御史掌四方之記我朝以雜端正百官之邪

其名則同所職實重副是慎選其惟通才某官查文徽克負美名早從交辟尋陟郎署升為王臣法讞之難俾其叅決而察情無不當持論無不平俾上絕濫刑下知耻格率是幹用使持憲綱在能振舉霜威肅清朝序爾其直躬而處衆正色以當官糾繆繩愆無或顧避陟明有典可不懋哉可

左常侍張義方可勤政殿學士

夫珥金貂直騎省以備顧問非不重也而文學之選且又加焉某是號名儒久登華貫臺閣踐歷聲實相符侍極而來當官無撓朕祇奉先烈勤求大中諮訪闕疑藉

爾稽古特加近職以示開懷順美弼違無忘謹直

楚州刺史劉彥貞可本州觀察使

勅懋官之旨非增秩不足以示寵行邊之任非進號不足以申威施之其人是為令典某寬厚得衆深沉有謀克荷家聲累膺朝寄百城觀政三郡底寧而長淮上游地雄師衆刺舉之職未及當官廉問之權實諧僉議曰是數寵更佇厥成噫千里之長三軍之帥任遇斯重勳庸是圖爾其敬哉無隳乃力可

外祖母追封某國夫人

勅昔帝欽明義先敦序九族既睦萬邦以懷矧乃推自

業之恩疏漏泉之澤有光茂懋典式表孝心外祖母李氏
麗德坤儀垂訓內則儲慶漸生民之叶什顯魂開石窳之
田肆予渺躬弗忘祇稟而嗣膺鴻業若涉大川奉長樂
以自寧過躍龍而軫念追遠之數宜有加焉是用進啟
大邦載崇懿號昭示戚里知予永懷可

大理卿判戶部刁紹可工部尚書

勅周禮六卿皆有軍政漢制尚書奏事禁中歷代親重
也如是今予有命亦屬其才某官刁紹始以幹能屢參
煩劇向由卿等踐歷省垣制國用而無違登生齒而有
羨丕顯成績是為才臣今朕祇嗣丕圖永懷司會俾率

諸吏表於南宮爰陟冬卿式申慶澤爾其欽承彛訓修
舉官司無忘克終以忝殊渥可

兵部侍郎張義方左常侍副

勅某珥貂服冕侍從獻替騎省之任也必以儒學大僚
端方名士入膺茲選允叶茂章而爾義方可謂能矣踐
歷臺省抑揚聲實純誠直道造次靡忘今予眇躬嗣守
丕訓弗惠厥德思聞讜言乃均慶恩命為常侍從容左
右敬佇嘉猷爾其念哉無渝乃節可

太常少卿李貽業可宗正卿

勅先王睦親也必求宗姓之賢者朝行之名臣為之表

儀序其昭穆今我有命時惟舊章某官貽業學以潤身
文以行禮貞以幹蠱直以事君有一於此是可嘉尚矧
備四者非所謂名賢乎今朕嗣續丕基敷遵慶澤是用
選於掌樂為我司屬使吾宗室有信厚之風非貽業而
誰勉修厥官無忝多訓可

左司郎中陳繼善可工部侍郎

勅國有六職百工預其一為我朝已來其選尤重矧自
尚書郎而擢拜者不其鮮歟某官陳某以幹蠱之才克
今上御名之美亟更庶尹遂歷省垣委之以繁雜之務而事益
明兼之以權筦之司而利不墮弢羊心計亦莫加焉屬

朕出震嗣圖施令布慶二卿之任頗難其人今以繼善
為之爾其可以稱職噫大僚之體存乎簡易興利之要
在乎廉平無渝乃誠以撓吾法可

水部郎中判刑部蕭儼可祠部郎中賜紫

勅某官蕭儼夫王者之為政也任能舉直理刑懋功如
斯而已矣今秋官卿佐皆闕爾儼實專其司定法察情
克舉攸職切言直氣屢聞於朝靡私厥躬何其愛朕之
深也方將圖劾適屬均息是用就升名曹仍加命服俾
耀者闈時予寵章爾其念哉無易乃心無回乃行決獄
以寬簡當官以公平一心克終予慎嘉汝可

勅某官李景進昔漢館陶公主為子求郎而不得何者
非其人也今汝景進亦吾外戚而謹愿儒雅好學善言
久為臺郎頗副時望故均慶澤擢轉名曹彼漢推公而
吾獎善兩得其道不亦宜乎

徐公文集卷第七

徐公文集卷第八

東海徐鉉

張援可司農卿制 李潯正授江都令制

潘處常可金部郎中制

高越可檢校水部郎中制

景逵檢校司空制 景迪可檢校左僕射制

鄭延樞可清江縣令制

艾筠可江都少尹制 閻度可江寧府叅軍制

馮侗可祕書省正字制

李景述可虞部郎中制

趙丕可司農卿制 成幼文可主客員外制

袁特可浙西判官制

喬斥臣愛可浙西掌書記賜紫制

查文徽可樞密副使制

顧彥回可浙西推官制

周弘祚可池州刺史制

鮑濤可虔州判官制 閻居常可檢校司空制

韓熙載可兼太常博士制

張緯可句容令制 高越可水部郎中制

趙仁澤寧國軍都虞候制

高弼可元帥府書記制

孔昌祚可泗州刺史制

方訥可東都留守判官制

田霖可東都留守制 張師古可校書郎制

王崇昭可江西觀察衙推制

沈翺可大理司直制 李臣明可中書侍郎制

翟延祚可水部員外郎制

唐顥可監察御史制 馮延魯可勤政殿學士制

林廷皓責授制 告天地文

祭世宗皇帝文

太府卿張援可司農卿兼大理寺事

書曰任官惟人又曰惟刑之恤朕服斯道因舉而行某官張援為性端方處眾和雅貞亮足以幹事哀矜足以得情亟更攸司弗易時用曰予有慶期爾盡才命為大農俾掌廷尉於戲庶獄之慎不可忘也單辭而行不可為也平反伏念夜思晝行尚於措刑體我求理敬之哉

權知江都令李潯正授

勅四京令之重也其選惟一是必試可以進之均慶以寵之蓋欲慎厥官而安其政也某官李潯屢為長吏綽有能名東夏之理不易其操事簡俗便予甚多之爰用

加恩俾從真授勉欽朝獎無懈乃心可

和州司馬潘處常可金部郎中

勅先王之制官刑也過無所隱其肆大眚也善靡有違無私之義於是乎在某早服時望亟更臺郎予在東朝列于賓席旋貳廷尉實奉邦刑偶違伏念之言遽貽一黜之命今朕祇嗣丕業誕敷慶恩豈以職事之愆遂忘罇俎之舊是用召自近郡陟於南宮勉承寵光以求無咎可

浙西判官高越可檢校水部郎中賜紫

勅王者之建藩輔也必命重臣以臨之又擇賢士以佐

之政咸當遷留而增秩古之制也高越以儒學淹雅見稱於時頃自南宮直于東觀筆削之言方勵弓旌之禮是求從事大邦率多婉畫有嘉令望爰屬慶恩俾假正郎仍紆紫綬服我加等之命無懈盡規之心

安陸郡公景遠檢校司空太府少卿

勅夫太上立德其次親親能兼之者鮮矣惟是具美屬於我朝某孝友資身身幹為質守樞機而無悔居富貴而不驕藹然善聲成此嘉器朕肇襲丕業廣覃慶恩矧有名臣近在宗屬是用假以空土列於亞卿仍進崇階併示優寵於戲行為民則爾其勿忘愛克厥職朕不敢

尚服我多訓永揚令圖

保定郡公景迪可朝散大夫檢校左僕射賜紫

制

勅朕歷選列辟見其睦親名器之難必當慎簡信不可私於其屬也故我疏寵務先推公保定郡公景迪靜惟端方動必孝敬佩師友之訓成信厚之風宗室之間問望尤著屬我嗣服之始叶於立慶之恩爾其率循令猷惠迪前勳勿驕勿惰以永乃成

左拾遺鄭延樞可清江縣令賜緋

勅夫邑令之有聲者入奉清列諫官之滿歲者出宰百

里蓋朝廷憂民立政之意也某官早歷官緒無廢官常擢叅禁垣克服彘憲而南楚大邑長吏尤難命自周行徃宣朝旨仍加朱紱以示殊恩無易乃心勉修所職

浙西判官艾筠可江都少尹

勅天下之大建親分陝以尹之東夏之重選能設貳以維之茲用安民而政舉也某官艾筠識量純素學術通明奉我東朝周知其善輟惜借侯幕載揚令名海虞偶之重筠有其力夫以亞尹之難如彼而有適用之才若此俾膺慎選不亦宜乎勉勵公方更施勤績

閻度可江寧府叅軍

勅鄉貢明經閻度士子起家而預清級者蓋亦有之自非才地兼茂則不能光朝命而協時論矣以爾名父之子自強不息學業履行實淳于名屬予出震之初成我多士之世俾掾天府以漸亨衢無忘益恭更揚令名問

馮佃可秘書省正字

勅五品子馮佃蘭臺圖書之府起家而預之自非有才孰克處此以爾早服嚴訓實揚令名勵學檢身如恐不及成爾嘉器富我士林俾授初資以漸清貫無忘詩禮之學以益刊正之勤可

舒州司馬李景述可虞部郎中

勅王者用士其要惟公苟得其才近親何避某官李景述承茂勲之後秉素士之風頗有美名聞於戚里郡丞之任為久臺郎之位為宜俾䟽慶恩改授清級無忘師友之訓以奉朝廷之儀

江州判官趙丕可司農卿

勅王者之正百官也黜其有過其肆大眚也許以自新則邦典行而朝恩浹矣某官趙丕謹行以處眾克勤以在公臺省踐更誠心不替故先皇獎用寄以準繩而靡達官常自懼常憲朕纘承鴻業廣布慶恩以其久列班行偶因迷謬特申渥澤俾授正卿勉勵乃心佇揚令望

江西推官成幼文可主客員外郎

勅諸侯之佐命于朝廷而治職有勞奏課稱最者則當升閨籍補為省郎蓋勸能取士之旨也某從事大鎮于茲累年本以誠明濟之通敏論不阿諂政無頗邪一方允釐爾實有力今予寵爾以立朝之位命爾以司藩之官爾其敬哉無忝我陟明之典

洪州判官袁特可浙西判官

勅袁特朕以闕輔之大控制要津出保傅之重鎮之以屏王室擇賓從之賢佐之以齊政經而特尹縣神州理甚簡便運籌盛府言必端詳協於東求宜授斯任夫潤

之民固與洪無異而爾之操當與初不渝則官業允釐而朝獎無替矣敬服斯訓往勵乃司可

洪州掌書記喬斥斥可浙西掌書記賜紫制

勅喬斥斥朕以師傅之重敬而不違式遂便安俾臨關輔而軍旅之事不可無佐奏記之任不可非才闕斥斥以高文受知以直道從事歷歲斯久弘益居多故因其賓席之資加以紫綬之貴改轅東適從吾上公無替初心以忝朝命

知雜御史查文徽可起居郎樞密副使制

勅秉記言之筆以待左右受司聰之寄以典出納並居

二職其可非才某官查文徽儒雅表文忠厚成質早踐華貫時為名臣以南宮清望之資當憲府雄極之任提綱有序而衆目以理正身自處而周行以清物論與之予用嘉尚居中理極不亦可乎噫為朕腹心注人耳目執節一懈悔咎隨之爾其慎之無忝吾命可

潤州丹徒令顧彥回可浙西推官

勅長人之吏親職為勞觀風之佐坐籌為異均其所任是曰優恩某官顧彥回以清節士風嘗參王府以耆年篤行出字齊民課績尤異自當優寵馳驅州縣非為所宜俾陟賓階奉我元老優游盛府足以光華

撫州刺史周弘祚可池州刺史

朕以將復淳風務先理道思得良二千石以安吾民儻副簡求迭受大郡斯蓋布政懋官之旨也某官周弘祚勲臣之子雅有文風自服佩恩華踐更事任訓齊武力能得士心綏懷邊戎克壯兵略俗阜秩滿序勞當遷朕觀其才可謂良矣青陽名郡控制中流前所任者咸屬重望今以授爾爾其欽哉進爵升階式示兼寵苟勤節弗易池人來蘇考績策勲吾有彝典

吉州判官鮑濤可虔州判官

勅虔之為鎮俗雜地廣化不可一時生寇攘萑蒲既平

閭井思又可以佐吾良帥而寧吾齊民者亡聞某官鮑濤久倅列郡克舉官常從政以和理劇無滯况虔吉鄰郡聲績素彰便道之官率舊為用副茲慎選誰曰不然爾其敬承無忝明訓

給事中閻居常可金紫檢校司空充盧州節度

副使

勅王者推念舊之心中優賢之旨官序出處從其所安諒不可滯於一方也某官閻居常執心冲粹為學精博修賢人之業多長者之言粵予纂承實重舊德俾掌駮議直于瑣闥而無妄之疾未痊貞退之請彌切重違誠

願抑此朝恩俾佐藩方式便願養金印紫綬邦土憲司
併申申寵光以示優渥陟明之典當俟有瘳可

虞部員外郎史館修撰韓熙載可太常博士
勅某官韓熙載朕以因心之感同軌有期嚴恭禋祀仍
從此始求所以節豐儉而振廢闕者屬於禮官慎選其
人必在時彥以熙載學問精贍辭氣亮直本以通識濟
之奇文惟名與實咸副是命故輟自東觀列于曲臺使
代稱禮樂之盛吾實有望於爾勉之哉

虞部員外郎史館修撰張緯可句容令

勅為政之要在乎安民長人之利在乎慎選故吾用古

道擇尚書郎而命之某官張緯學問該通辭藝精絕自
東朝載筆石室抽文朝論藹然以為名士矧又洞識理
體周知物情是為通才何適不可王畿大邑既庶而富
藉爾敏惠為吾教之仍假臺郎以申朝獎苟聞報政豈
悵加恩可

浙西判官高越可水部郎中

勅多士之世副臺郎之選者前代謂之賢乃知三署之
屬例無輕授某官高越早踐朝序嘗為史臣當官有聲
聚學不倦頃屬上將出臨大藩輟叅入幕之資備觀理
劇之用府罷赴闕時名益高司川之秩俾從真授無忘

職業以荷朝恩

左監門將軍趙仁澤可寧國軍都虞候

勅南藩之寄宣城為最師勁而衆地近而雄故朝命列
枝以貳軍事所以重其威令也某官趙仁澤名將之子
頗有父風在軍積年武畧精練出寧大邑歸預禁營副
予簡求俾隸宣部往綏乃績無替前芳

左司郎中高弼可元帥府書記

勅某官高弼王者之用帥也必先以文告之命訓誓之
辭故戎車之往記室為重而朕前委愛弟實司邦政今
命爾弼使典軍書任才責功其意期在矧弼嘗參西掖

尋履南省所歷之任籍籍有聲今能奮雄辭而塞慎選
陟明之典予豈忘哉

左領軍將軍孔昌祚可泗州刺史

勅左領軍衛將軍甲仗宮城營造等使孔昌祚朕以長
淮北徧閱隔戎夏惟彼泗口實當要衝凡為守臣罔不
慎選而昌祚以真幹事以勤懋德周廬巡徼之政宮禁
繁劇之司董齊典理靡有違者歷歲且久秉心不渝朕
觀其才可為邊將授以符竹付之臨淮爾其揚乃武威
修乃郡政登于考功之籍以塞任能之恩可

水部郎中方訥可主客郎中東都留守判官

勅某官方訥朕以分陝之任非親賢不可故迭用子弟以居守復以佩觿之齒唯訓導是務故慎選名德以從行而朕在東朝先皇命爾訥列我賓席恭慎文雅抱其風度將順規諷揖其忠誠尋又奉予愛子益固是道今所授任非訥而誰客曹正郎留臺幕職往示兼寵爾其敬哉乃心不渝懋典寧忘

秘書郎田霖可東都留守巡官

勅某官田霖朕命愛子表正東夏管記之任樽俎之間唯才與行乃可是選而朕在儲貳則嘗知霖文藝直心綽有餘裕累叅載筆之任近登秘籍之司列於王官頗

叶時望故授以留臺之職副茲託乘之求爾往敬哉無忝予命

前山陽縣尉張師古可秘書省校書郎

勅王者之行慶也獎能振滯赦過責功如斯而已矣某前為縣佐以公事罷免而聞其立身修已有足多者故從其滌瑕之命升諸秘籍之司徃服乃官勿重而悔

江州錄事叅軍王宗昭可江西觀察衙推

勅某官王宗昭西南大藩庶政繁會訟獄之理欽恤是先重輕一隲手足無措必得朝士以典掌之而聞宗昭可當斯任徃蒞乃職無忘益恭

前舒州錄事參軍沈翺可大理司直

勅某蔭籍從仕以儒術資身蓬閣曳裾早揚聲問侯藩
載筆亦懋勤勞向事主符實司綱紀州縣之職非其所
長既失儀刑遂從罷秩今慶賞斯決一肯咸矜復爾名
籍俾叅棘寺吾不記過爾其自修

前舒州刺史李_所明可中書侍郎

勅朕以不德恭承丕基思聞獻替之言以自開悟故以
侍從之列尤用簡求矧乃職奉詔命地叅公輔歷代精
選可虛授乎某以風度爽邁克嗣遺_{今上}以文章弘雅累
踐清途先皇器之任遇尤重故其冠翰苑掌天官長憲

臺肅千里靖恭于位績用有成舒人既康執璧來覲宜
加疏等之命擢為鳳閣侍郎敬之哉出為諸侯非不貴
也入首三品非無位也持重足以鎮物納忠足以報我
_所正不逮予有望焉

歙州觀察推官翟延祚可水部員外郎

勅某以外諸侯吏入為尚書郎者非推恩酬勞何以臻
此聞爾宰百里佐廉車皆有政能宜當選任徃祇乃事
無忝予恩

大理司直唐顯可監察御史

勅某夫御史之列皆一時之清選而貴仕所由漸也聞

爾執心有常從事以直持刑甚平允當官有勤勞故升
諸朝廷俾之察視爾其懋乃才用修我紀綱無傾側糾
訐以為能無依阿願避以自守勿貽爾悔以忝予恩

禮部員外郎馮延魯可中書舍人勤政殿學士

制

勅侍從庶職摠司同清要若乃叅書殿之列備切問之重
使如綸之命式光人文無詢之言不入吾耳所寄若是
其選可知某惟望與才皆副是任况東畿亞府有理劇
之用南宮禮典多伏奏之勤俾膺簡求必叶虛佇夫前
言徃行爾所祇服正辭讜議予之嘉聞無從非曩以忝

多訓

筠州刺史林廷皓責授制

勅恥過作非言不顧行為臣如此在法難容某頃自歸
朝頗推有勇俾之為將所以圖功及封疆多難之時車
徒四出之際遂能激揚壯節指之師旅付以圭符而畏
懦屢聞遁逃不暇震驚城守註誤軍謀當此之時已宜
行法予以義深罪已功在止戈既屈身以弭兵乃舍垢
而務德復移郡寄仍綰使權苟奏課之有聞亦在人而
何棄未終考績爰掇訟辭猶且累上表章屢言今上陷洎
遣制使明徵其辭乃自滁揚罷郡以來筠州移任之後

侵漁公帑積數且多干犯詔條為罪不一證據明具詞
理並窮殊不省非更為文過謂競廝養為恥以對獄官
為羞欲蓋彌彰侮我何甚其武勇也既如彼其誠心也
又如此倘猶強恕何以律人尚以君臣之間務全終始
特從薄貶庶克自新勉荷寬恩無重而悔

告天地文

臣以寡昧叨嗣慶基對越上玄申養長樂側身恭已靡
敢荒寧而聖尊后自夏秋已來寢膳違豫醫藥備竭禱
祠必至數月於是有加無瘳憂勞之誠不知所措敢陳
蠲潔仰告威靈伏惟精懇上通玄恩錫佑祐哀臣烏烏之

志憫臣欒棘之心使六氣惟和百祥薦降冀於旦夕速
就康寧臣內顧眇躬弗明於道方深慈訓之益欲報劬
勞之思烝烝之懷區區於是隳瀝肝膽以俟鑒臨

祭世宗皇帝文

稽古靈命造圖伊始聖人既生萬物咸理玄功格而高
謝令問垂而不已通玉帛于無外執豆籩而萃止蓋百
代之不易言皇猷之至美恭惟盛德乃聖乃神爰初續
服舊邦惟新瞻顧函夏實始經綸三驅示禮四載彌勤
濟之以武守之以文降鑒迴慮全國庇民既戢兵而禁
暴咸服義以歸仁功成理定返樸還淳羣賢在位百度

惟貞方將致宣王之薄伐焚老上之龍庭還師衽席檢
玉云享何祝壽之無感忽綴衣之在辰嗚呼哀哉神祔
軒丘化流南國率感義以孺慕共銜哀而膺臆日月以
之匿曜煙雲為之改色痛輯瑞之長違恨攀髯而不得
嗚呼哀哉永惟下國獲嗣餘基奉天光而不早順文告
以何遲仰電霆之振以警其失賴陽春之澤以赦其迷
既賓禮之加厚亦息情之過私大信有十齡之固承勸
無再稔之期覽訃書而慟絕捧遺使以漣洏嗚呼哀哉
集同軌於七月過八音於四海喬山之冠劍長掩灞涘
之川源不改敢薦忠信敬陳脯醢庶有感而必通願降

神而如在

徐公文集卷第八

徐公文集卷第九

冊書

東海徐鉉

封保寧王冊

蔣莊武帝冊

追封豐王冊

慶王進封陳王贈太尉冊

昭惠后謚議

光穆后謚冊

追封許國太妃冊

追封安王冊

劉仁贍改封越王冊

追贈留從効父冊

光穆后謚冊

維年月日嗣國主臣某再拜稽首言臣聞體厚德而母
萬物存乎尊位騰耿光而蕃百世繫乎鴻名繼統廣業

莫斯為重顧惟小子懼忝貽謀對越祖宗敢揚公議伏
惟大行聖尊后姜任顯族皇英茂德作合元聖長發祥
符秉婦禮於儲闈正嬪則于四海孝心天賦惠問川流
祚啟重熙尊歸里理內率循陰教欽若皇猷順承利坤元
之貞輔佐流周南之化慈撫公族仁懷六宮清淨廣于
真風戒慎刑于外戚用能永錫繁祉弘濟多難保佑冲
人克荷丕今上仰繫慈訓方恢景福靈臺告祲永樂長違
罔極之懷觸緒荒殞恭惟尊名節惠之典載考儒臣禮
官之稱咸以為光大孝悌之懿肅雍賢德之盛昭映前
烈垂示無窮列辟承式弗敢失墜謹奉玉冊琮寶上尊

謚曰光穆皇后伏惟威靈如在鑒茲禘禮延九廟之積
慶與二儀而長存嗚呼哀哉謹言

封保寧王冊

維保大元年八月丁未朔某日皇帝若曰稽古夷庚祗
叶皇極建侯樹屏保又王家用能乘運會昌歷世重光先
哲所以啟後列辟所以時憲者也我思立愛宜有加焉
咨爾二十弟某中和萃靈寬裕成德戲必俎豆之禮學
無城闕之遊聰明仁智仰遵前訓孝友姻睦率由生知
昭此玉音應于麟趾朕以不德凜乎丕承文武之功期
無獨享契龜胙土抑為舊章今使使某官某持節冊爾

為保寧王食邑二千戶敬之哉昔我文考對越上帝敷佑下民克儉于家無縱于逸再造之業與世無窮予以爾有邦膺受繁祉今爾尚迪遺烈保終令圖無從非彝無狎非正耆老是聽訓典是師綏寧乃封以永元吉

追封許國太妃冊

維保大三年太歲乙巳七月乙未朔某日皇帝若曰昔在祖后法象天明旁求淑女式享陰教並建內職以麗外朝故其先德之舉顯魂之命比爰庶尹無不及焉蓋敬終貽後之旨也咨爾故汝南郡君周氏恭儉執中明智資性頃諧法相入奉先朝紘緼之勤夙著于彤史湯

沐之寵竟飾於泉扃粵予纂承祇稟茲訓家道既正國風以理仰蹈成式永懷舊人是用釐舉闕遺追崇名教教昆吾舊宅太岳全邦申畫四封以先懿德今使使某官某持冊封許國太妃嗚呼令聞不忘盛典無替昭昭復魂聞予此言

蔣莊武帝冊

維年月日皇帝若曰稽古皇極訓民事神詔大號以崇正直之威垂大名以紀昭明之德牲幣有數典禮不愆政是以和神降之福莫不由斯者已若乃以死勤事沒而不朽流光儲祉蔣帝有焉惟帝冥符靈氣孕毓立造

嘉猷雄畧昭映前人在昔潛耀大川躍鱗下邑著艱難
之節所以事君彰變化之神所以顯俗惟德是輔感而
遂通建福會昌以戡時難豐功厚德以享帝郊史臣執
簡于無窮工祝正辭于不絕顧茲寡昧祇嗣龐鴻敢忘
人謀以叶靈貺瞻言南岳作鎮皇州興運惟新禎符丕
顯而位極于炎昊名謝於康惠墜典未舉予用慊焉濮
陽諸姬實纂服之舊邦尅亂除害乃庇人之盛業合為
縟禮申告祠庭今使使某官持節奉冊追謚曰蔣武帝
嗚呼丹青懿烈光光如彼簡冊廟貌昭昭如此永為民
正無乏神主之望焉

追封安王冊

維年月日國主若曰稽古大猷啟迪來裔藩翰之寄重
事也不以親屬為嫌寶玉之分盛典也不以死生易節
昔在有魏蒼舒早世降及我唐子雲無祿咸用追啟王
社飾于泉扃垂為憲章肆予遵舉咨爾某稟信厚之德
持謙下之資在傳不勤為善最樂烝烝孝敬之性恂恂
友悌之風及苴茅北藩授任殿省別六尚之名物參九
戎之政令行以正直持之公平諸御知方羣校競勸職
修事舉朕甚多之爵止極于公封位未登於六事流光
不待時望慊焉申予有慊之懷加爾飾終之禮冬卿峻

秩楚澤全封丕舉茂章永光餘烈今命使某持節冊贈
工部尚書封安王嗚呼延吳之壞予用多愧間平之德
人其識諸簡冊無虧丹青不泯昭昭復魂亦克知之

追封豐王冊

維年月日國主若曰名器之重典冊之崇不以親疎為
嫌至公之舉也不以死生易節歸厚之道也先哲彝訓
我儀行之咨爾某挺岐嶷之姿稟山河之秀亦既就傅
時惟老成迪祖宗之猷不愆不忘奉詩禮之學惟幾惟
勤公室所推藩屏攸寄秀而不實凋此妙齡天性所鍾
永悼何已真王異數護塞雄藩舉為寵章飾彼幽壤今

命使云云嗚呼分以寶玉苴以白茅弗及圖功猶足表
德尚爾不昧知予此心

衛王劉仁瞻改封越王冊

維年月日國主若曰忠臣之事君也歿且不朽王者之
念功也久而弗忘故賢哲膺期風烈所及千載之下若
旦暮焉矧先朝舊臣藩方賢帥雄名大節震耀區中粵
予纂承敢忘褒寵咨爾故某命世英傑奕葉勲庸便蕃
寵遇茂著聲實聞者輟自離衛鎮于壽春導德申威固
不率俾國步中梗邊烽載驚介然孤城橫制險地威略
所奮以戰則靡亢恩信所加以守則彌固社稷是衛豈

惟封疆嗚呼壯圖中奪而英氣動於二國奇表長謝而
忠規流於百代肆我文考爰極寵章崇為帝師建以王
社大名脩物無不及焉咨予小子敬想先正聞聲之感
斯極飾壤之禮未行是用越于彝章再光贈典山陰大
國會稽遺墟申畫四封永旌懿烈今遣使某官持節改
封越王嗚呼忘身殉國其至如彼慎終追遠其厚如此
永錫繁祉子孫保之

慶王進封陳王贈太尉冊

維年月日國主若曰古稱王者之貴必有光也豈不以
在原之助義切於邦家陟岡之恩情均于存沒自非贈

飾之寵寧申敷叙之懷稽迪前經式揚盛典咨爾某受
天正氣為國宗英器量川停機神秀出縱橫之智發為
事業儒雅之度播為文辭自錫壤侯藩調兵蘭_蘭錡行令
惟一撫下惟仁周廬不驚宸極甘寢天覆形于鍾愛時
望極於維城景命不融儀表長謝壯圖大略嗟時運之
難并遺文餘烈綿歲序而常在粵予小子祇荷丕_{今上}奉
慈訓于長樂頒分器于懿親友予之恩追懷何已是用
修嚴縟禮申告九泉_原以王有文雅之稱故改封於陳社
以王有重厚之器故建號於上公光昭令典永垂不朽
今命使某云噫花萼之遊宛成今昔寶玉之數遂隔

平生尚想明靈鑒茲永悼

追贈留後劾父冊

維年月日國主若曰立身揚名君子所以顯父母也慎終追遠王者所以厚風俗也政之大者其可忘乎咨爾清源軍節度使留某父贈鄜州都督彥雄行當於躬量韜于世修誠明而應物積善慶以流光實啟高門誕生賢嗣建節風雲之會致身藩翰之權清寧一方表率羣后歲勤職貢恭守朝經位宗帝師勲在王府向非稟訓有自膺期而生則功勲所昭何以及此雖褒贈之典已賁於九原而督護之名未光于太府俾加緡禮荐洽朝

章今遣使云云持節冊贈爾為潞州大都督於戲節鉞之貴命屈於生前典冊之崇禮符于不朽既足以光爾之有後亦所以表予之推恩昭昭有靈知我斯意

昭惠后謚議

臣聞廣莫極于坤元則含容光大擬議著焉尊莫隆于王后則窈窕思賢詠歌發焉是以上德無名而稱謂流於百代至道無象而儀刑所表于萬方此固天理出于自然聖人所以無避者也矧惟節惠之禮百王盛典述德之議史臣至公誕昭耿光敢揚懿德伏惟大行國后生商遺烈安劉積慶淑質竒相惠問英才光映台華作儷

公族紹隆藩閫載輯儲闈世子專寢門之禮孝心不置
大君以家人之慶天覆有加誠由肅雍之德叶協此睦姻
之盛言內則者以為美談及屬運飛天尊歸配地嚴恭
匪懈稟母儀于上宮慈惠積中率婦道於天下澣濯是
服而六衣有煒環珮中節而有御有倫思脫簪之誠以
成憂勤之政躬大練之飾以輔純儉之風陰教既孚王
化茂遠方輿告變椒風永闕慟結長樂哀纏紫宸龜筮
叶協從攢塗將啟旌德之號彤管斯存若乃山河表德而
文之以禮金玉其相而守之以恭垂訓以慈進賢以哲
至於誦經習詩之敏審音知樂之明超然遠識夙絕終

古勤行孝養下自從禮故寬裕懷於六宮天資明惠學
無不通故遺愛鍾于宸眷載稽具美寶光前烈謹按謚
法德禮不愆容儀恭美皆曰昭慈哲遠識寬裕遺愛皆
曰惠仰惟寶錄足表鴻猷謚曰昭惠后謹議

徐公文集卷第九

無不... 徐公文集卷第九

徐公文集卷第十

武成王廟碑

蔣莊武帝新廟碑銘

東海徐 鉉

武烈帝廟碑銘

重修筠州祈仙觀記

筠州清江縣重修三清觀記

武成王廟碑

下臣伏讀前史窮探政經莫不以兵戰為危事日干戈
為凶器異達人之格論蓋曲士之常談若乃上考洪荒
遐觀擬象九疇垂範何嘗棄從革之功五緯麗天詎可
論長庚之耀春生夏長非秋無以收成雷動風行非霜

不能肅殺先王設教疇敢渝之垂衣裳以正其本為弼
矢以申其用坂泉戡亂所以見軒后之神明丹浦庇人
所以成帝堯之光宅七旬來格本由舜羽之仁八百同
辭始自葵枯之惠故修文廟堂之上者武功之始折衝
千里之外者文德之形如仁而忘兵則西夏偃王以之
而殞恃力而棄義則夫差羸政由是而亡乃知文德不
修則武功不立武功不試則文德不昭相須而成其揆
一也故立其教者謂之聖大其業者謂之賢聖則應天
順人西伯受代殷之任賢則開物成務太師有佐命之
功當其偃息朝歌盤桓渭水量恢宇宙既處困而能通

才冠生民亦俟時而後動雲雷之屯已今上御名天人之契冥
符歷數有歸君臣相遇投釣而起同車以還尊為王者
之師我無慙德加之百姓之上人絕異言大矣哉聖哲
膺期無得而稱已故能式遏亂略大拯橫流把白旄而
誓師操黃鉞而助斷解倒懸之困釋比屋之誅大統既
集天保已定然後式廬表墓歸馬放牛申義封于夷齊
授成事於旦奭宏開四履高視五侯及其德澤將衰風
流已遠猶使紀侯大去不遺九世之讐周室既卑更賴
一斥之業自非道充四表功濟三才孰能不顯烈光若
斯之盛者也其後聖人既沒真風漸漓戰國如焚羣生

殄瘁先王利器舉為爭奪之資闕里諸先生率用縱橫之說遂使中都憤歎聿興末學之詞柱史傷嗟始發不祥之論流遁忘返積習生常則我武護之音將墜於地夫至公所以應羣動上德所以綵萬殊達其旨則左右咸宜迷其本則弛張兩失自漢叅霸道魏濟姦雄藐爾千年荒哉七德國家參墟發命扈水膺圖羣黎興後后之辭八表有宅心之地高祖奉天革政扇牧野之高風太宗屈已師臣躡渭濱之盛軌施其法則致其報入其國則思其人貞觀年中始于碯谿立廟玄宗祇若先訓奮發神謀平內難於女戎嗣鴻圖於代邸永言遺範重事

嚴裡開元中詔京師及天下州府並立太公廟著良辰於上戎抗縟禮於虞庠而復歷選前修式崇配享得其體者參入室升堂之列蹈其跡者儼摳衣函丈之容穆矣皇風煥乎甲令肅宗來朝走馬初嚴避敵之師九五飛龍遂荷在天之命澆戈既戮商奄猶驕方資戡定之勤更舉褒崇之詔禮尊南面位極真王取其大告之稱以定易名之典歷代之闕文脩矣聖皇之能事烝哉故得靈鑿孔昭羣臣競勸諸侯供職函夏同文中興之功配天齊古雖復運逢興替時有安危造周之德既隆思漢之人常在烈祖沉潛剛克神武有徵靜氛癘于蕭牆

功高庖正掃攬槍於丹徼業茂賓門由是四海樂推三
靈眷命光復舊物洪惟至公大道將行皇猷累洽今上
允文允武克長克君自出震見離發號施令雷行天下
豐宜日中信及豚魚仁霑行葦若夫尚齒尊賢之教宵
衣旰食之勤制禮作樂之文返樸斲雕之質固已紛綸
帝籙掩映瑤編猶復叶比臧謀疇咨庶政以為五材並
用廢一不可天下雖平志戰必危是故簡萬乘之人申
九伐之令六官聯事百度惟貞副君以介弟之尊當撫
軍之任威而不猛動必以仁大元帥齊王明德茂親由
諸王而宿衛副元帥燕王敦詩閱禮以長子而帥師用

能啟迪大中張皇下武其餘西京名將霧集星羅北府
奇兵飈馳雷驚並列雲臺之像咸開長水之宮營地利人
和思深慮遠域中無事則用之於進賢興功四方有變
則用之於吊民伐罪故出車甌洛則係以長纓鞠旅衛
湘則舉為內地皆所以拯其塗炭之患息其沉闕之爭
非徒誇大兵威兼并土宇而已至於篁竹萑蒲之聚田
昭屈景之宗或粗舉先聲或聊分偏校莫不厥角稽顙
請命即刑史不絕書野無遺寇斯乃聲名文物之外廟
堂帷幄之間思未半之功已倍矣加以為而不宰讓德
於天潔染豐盛靡違於時事春蘭秋菊遠被于無文乃

顧崇韜式嚴邦政以為三王四代之事罔不從師前哲
令德之人必將崇祀列聖盛典實啟孫謀乃復舊章爰
作新廟于是宗伯建位梓人授規入端門而右迴旁太
學以西顧瞰康莊而列屏曰爽塏而營基他山之石威
移中伐之材畢萃成之不日自比靈臺揆彼方中寧慙
楚室崇堂屹以特起高門豁其洞開筵有籩豆之區階
有賓主之位干戈在序鐘鼓在庭緘然觀藝之場藹爾
致誠之地春秋二仲時和氣清醴醎交羞牲牲不疾鶡
冠礪劍展告虔荐信之儀玉戚朱干儼象德達神之列
中軍元帥出建靈旗六郡良家來登勇爵旆旌饒吹桓

桓推轂之威金石絲簧穆穆宴毛之序觀之者亂臣知
懼比夫漢尊黃老詎臻清淨之源秦用刑名徒有刻深
之弊中庸之德其在茲乎嗟夫聖人沒而微言絕王澤
竭而頌聲息矣斯露寢諸侯之事何觀吉甫清風衰世
之音孰尚豈若帝圖光赫聖作宏新人知鼓篋之方家
識止戈之漸固可著之金石列在鼎彝微臣學愧常師
用慙兼備承明再入固無經國之才宣室徵還幸對受
釐之問將使延州聽樂長聞雅正之聲圮上受書世出
帝王之佐敢揚丕訓敬勒貞珉其銘曰
於惟基命建用皇極實有武備以昭文德弗惠弗迪是

糾是強天地剛柔惟帝之則是則是倣文王武王惟師
尚父時惟鷹揚正天下綏爰四方微禹之烈于湯有
光肅肅牽牲皇皇表海簡禮從質曰民不改難老曰壽
專征為大泱泱之風至今猶在大道既隱明王不遭走
鹿爭逐頽魚告勞泯若四履紛吾六韜我思古人心焉
怵怵天或愛民物無終否率此叛國歸于聖帝自葛初
征至牧乃誓君子萬年本枝百世鴻圖再造二聖重光
亦既大賚寧惟小康六事允釐四維孔張夢寐卜獵洛
嗟釣璜虎踞之陽龍藏之渙爰作新廟畢崇明祀設桓
交戟朱門納陞鬼竈崇重深奧秘名光大告禮重真

王侑神祀食入室升堂威儀文物容貌采章列聖有作
茲焉不忘膠庠既成教義既明三湘即序百越來庭馬
無南牧人怨東征烈烈政典洋洋頌聲商郊車騎灌壇
風雨績用不泯威神若覩鏤金石以表德荐馨香而受
祐春蘭兮秋菊無絕兮終古

蔣莊武帝新廟碑銘

臣聞南正司天授宗祝史巫之職春官掌禮詔犧牲玉
帛之儀皆所以別類人神統和上下三時不害力畜以
之普存百物阜安荐信猶多其品用能舉明德而徼景
福播和樂以致靈祇三五已還皆是物也若乃渾元宣

氣山岳成形雲雨於是乎生財用於是乎取故有毳冕
之服璋底之符或以肆瘞垂文或以履懸著法虞舜聖
帝也而有徧干之祀周武明王也而有惟爾之祈至于
禘田高邑之都藻莖桑封之秩禘祿有羨蘭菊無虧大
典竒篇論之備矣後王祖帝聞斯行諸金陵山者作鎮
揚都盤根福地峙天險之左次瞰臺城之北隅陽嶺前
瞻包舉青林之苑陰崖右轉經營玄武之池絕巘巖岑
蔽虧日月深岩窈窕吐納風雲層臺累榭臨其嶺湧泉
清池湛其下白鹿麕麕騰其藪鴛鴦雛孔翠栖其林豫章
杞梓之材橘柚楸梨之實赭堊丹青之美錫銀金碧之

饒固以事異假珍富兼諸夏登于軌物掌以虞衡矧復
竒怪中潛絢縕上屬真人末應瘞雜寶以祈年智士攸
同指盤龍而建國亦何必嵩丘發峻始號降神岷嶺騰
精獨稱建福自時厥后代富靈游刺史還都即有栽松
之地諸生肄業非無講學之場岫幌雲關訪徵君子幽
谷鹿中霞帔集道侶于中林斯亦羣帝之密都先王之
冊府者在昔霜鍾細品猶淹耕父之居及景徽光尚
駐長留之駕况乎皇州列岳宅怪儲靈不有吉神孰司
陰隲蔣帝孕清明之氣稟正直之資實九德之所生與
五龍龍而比翼自西江考績謝聯事於玄夷比部申威輯

庶功於黃綬于時祚終四百運偶三分夫懷墜炭之愁
家有剝廬之痛帝則勤勞狗物慷慨憂時既授張敞之
倅即振李崇之鼓赤丸未盡執漢節以忘生青骨難誣
降北山而受享飛蟲顯俗生民之舒慘焉依白馬耀奇
平昔之威容如在故使中都之印式報陰功長水之營
旁旌同氣廬宮改命非因介子之焚廟貌崇壇詎比愚
公之徙自是光靈茂遠代祀綿長或昭德而致祥或害
盈而降罰黃旗紫蓋奉五馬之禎祥朱鬣碧蹄珍高山
之巨盜賢如謝傅猶繫草木之形親若始安亦假弟兄
之助故得王封錫羨帝服歸尊追炎昊以齊稱躅虞黃

而接武事光典冊惠浹幽遐任水木之遶遷顧高深而
自改國家綠圖受社黃鉞庇人分二牧於土中包九有
于宇下雖十聯百里亟更守宰之權而四望五郊不易
宗彝之數及威儀暫失龜鼎中遷瀛海颺迴坤輿幅裂
而盤礴之際常奉周正封域之間獨為漢守衣冠舊族
宛洛遺甍咸趨懷德之鄉共免永嘉之亂終使皇天眷
祐百姓與能克昌再造之基奄有六朝之地烈祖功踰
嗣夏體濬哲而致中興皇上德邁繼文懋元良而恢下
武格天光表慰率土之歌謠累洽重熙漸羣黎之肌骨
所以珍符搃至靈命畢陳極金篋以標年畫瑤編而紀

瑞襲於六藝貫彼三墳矧復聖作無方神謀不測殷周
損益文武張弛制在先機申於後甲百吏奉行而不暇
兆民日用而不知帝典恢弘天文貞觀摘華發藻扶瞶
披聾丹浦非好戰之師兩階有誕敷之舞坐知千里廓
清五嶺之氛役不踰時底定七閩之難國風王澤自北
而南樹立之權由來尚矣康無專享止崇藩屏之封穆
弔不咸但著急難之咏未有極至公之舉正太弟之尊
大義鴻猷如今日之盛者也副君膺則哲之寄有聖人
之資由上德而貞大邦用英才而摠百揆麗正繼明之
業仰奉宸謀持謙敬客之心甫懷庶品則有齊藩上寄

紆盪綬而握兵符燕邸真王珥貂冠而掌宮籥周公則
武王之弟夏啟則吾君之子故能緝熙帝載寅亮天工
晏平仲之論和北宮子之謂禮自家刑國草偃風行上
下之際既交華夷齊之情如一黑齒竒肱之俗款塞來王
碧嵩素澹之濱除宮望幸后夔典樂已播薰絃司馬進
稱行陳秘檢功既隆矣德亦厚矣尚復往而未止謙以
益尊政靡不修思無不及以為無文咸秩訓誥之格言
明祀是崇春秋之大義農祥晨正豐潔四馳密雲不雨
馨香並荐載紆睿鑒爰顧遺祠詔曰蔣帝受命上玄奠
職茲土力宣往代澤被中區所謂有益於人以死勤事

者也今號位已極名謚弗彰闕典未申朕甚不取其以
勝敵克亂之業為民除害之功因姓開國追謚莊武仍
令有司修寢廟脩制度焉于是即舊謀新審形面勢農
工告隙營室方中或懸水以為規或飭材而攻木埽埴
之工屬至坊塙之伎星羅徑術常夷靡難王孫之草荆
榛舊闢寧誅宋王之茅百堵齊興旬歲而畢繚垣十里
重屋四周樹文玉於庭中交枝霍靡挺開明於闕外詭
狀鬢鬢納陞逶迤碧疊元州之石橫梁天矯雪披後渚
之梅豁朱戶之瞳矚陽光不夕闕深宮之靈霽暮霏常
霏堂上布筵楹間設奠莞磬鐘鼓羅于下籩豆簠簋肆

於前再變之音克諧永貞之祝無愧神光倏忽褰服連
蜷孔蓋翠旌若有光未而罔覲蕙肴蘭籍若有去而不亡
用是高揖靈立永司純嘏颺颺魑魅豈煩夏鼎之圖風
雨雪霜無待桑林之禱則知民和而後降福事理而後
不祈人祇之間如斯而已者也粵若先王命祀神道教
人前哲令德之流九魁六宗之類或以公族視秩或以
戶邑奉嗣同子晉之為帝賓真階匪極傳說之騎龍尾景
耀未融斯皆地勢本高升聞易達詎有權輕五校壤狹
一同而能比敬軒臺分光堯日縱質文之迭改代奉典
章及聖哲之丕承更加崇飾故金簡玉字興王之統可

尋兩騎五車受職之期斯在雖將歷選安得同年昔者
崑閩窮遊尚紀白雲之什燕然薄代亦陳玄甲之銘孰
與冥貺昭彰壽宮宏麗水通懸圃萃氣色于閩閩門路接
白楊煥丹青于駟野此而莫述後嗣何觀微臣潤色無
功討論奚取思問神于先聖姑欲事君苟獲罪于玄穹
過容媚竈惟於舊史想見英風適當罷役之初爰奉屬
辭之詔西州作頌誠慙邑子見稱南國刊銘或望至尊
所改庶使千八百國會執玉於茲峰七十二家配泥金
於此地其銘曰

茫茫玄造萬物資始一經神恠一緯人理先聖則之以

著網紀仰觀俯察上天下地高卑既定品物咸宜宣氣
者山配地曰祇三公是擬九德攸司天作金陵蔣帝荒
之巖巖金陵作鎮上國陰林巨壑材生物植洞穴岩房
逶迤詰屈隱士無言仙童不食洪惟廟貌奠此名位區
重天孫權傾陸吾薜荔之服辛夷之車若自空桑來游
下都翼翼京揚馮馮輦轂運屬多壘聿祈深福峻殄堅
夷勛必景履盼蠻玄功威蕤帝籙皇唐膺運和悅人神
崇名則舊受職惟新祥圖雜集祀典紛綸終全王土以
俟真人再造延洪繼文光大陰陽不測天地交泰沒羽
梯航雕題冠帶成民致力祭神如在猶防闕典乃顧遺

靈永懷簡冊欽若昭明克亂除害膺茲大名亦有制度
脩於祠庭式瞻昏定昏定既正爰揆農時農時弗虧虞
衡肅給般爾交馳加之龍斷益以章施新廟既成神居
既寧我有常祀蒸饋荐腥匪榮匪祈歆我惟馨三時不
害大庖不盈昔在周家逮於漢室徒騁驥驟虛羅甲乙
純嘏弗臻斯猷愈失載返真風爰歸聖日五衢植木四
照栽花馳烟驛霧晦景韜霞方介十巫何憂一車行觀
吉玉願折踈麻謝傅長逝王公不作獨我莊武先紆睿
略魯墳無棘遼城有鶴刻此茗華永傳嵩霍

武烈帝廟碑銘

臣聞昊穹凝命玄化不宰司契牧民之重授以聖功益
謙輔德之明顯諸神道玉燭景風之瑞所以報慶勤天
時地物之妖所以警安逸是以古之聖人觀災而懼曰
敗而成撥亂反正之勲偃武修文之業延洪光大皆有
幽贊者焉故禹奠九州受蒼水繡衣之命武師牧野接
五車兩騎之神或假靈于五將三門或取象於長庚北
落竒恠恍惚歷代有之然則潔粢豐盛崇名紀號欽若
天意丕顯陰功元元本本政之大者也茲我后所以側
身修德允濟時屯武烈帝所以禦災捍患光膺帝服人
神合應豈不偉哉惟帝才冠生民道高振古登賢能于

鄉老論昭穆於本朝若夫忠孝文武之風信智言之
懿提綱案部之績夷克靜亂之勤論道經邦之猷宮懸
錫^馬篤之寵忘身殉國之節驚愚顯俗之奇固已炳煥丹
青鏗鏘金石用能高標明祀大庇蒸民犧牲玉帛數有
加於羣望備物典冊禮遂縟于真王是知妙極無方數
均不測告禎符於下闕

告禎符於下闕宋初
缺一葉

闕三石五十字

獨能雖通幽洞靈實聖哲之所務而問神語怪非典冊
之攸先故揚摧而論蓋史臣之職也主上以功成弗處

無德不報增封進號厥有舊章乃下詔冊贈武烈帝備
名數禮也於是正南面之尊窮大壯之勢眈眈新廟奕
奕崇堂雉門兩觀之嚴左滅右平之制龍旂鑾輅雲罕
軒懸兼三代之盛儀抗五郊之殊禮與夫周人革命止
陳玄牡之祈晉室主盟但用朱絲之禱報功之典不亦
盛乎常州刺史何重貴初領前軍獨當強寇以忠貞為
甲冑以恩信為金湯首挫賊鋒力全郡壘褰帷之任因
以疇庸坐樹之風更成德讓皆足以光昭雅頌垂示來
雲後之君子知天命不可以智欺大福不可以力勝幸
災怙亂鬼得而誅背盟奸好人將誰與覆車斯在殷鑒

匪遙類委土以為師樹豐碑而紀事下臣奉詔謹勒銘
云
玄功不宰帝德無為化機冥運羣動交馳必有神道鑒
而董之董之伊何惟帝之職恍惚有象陰陽不測如岳
降祥配天輔德保我蒸民莫匪爾極偉哉間傑多藝多
才名馳八紘位重三槐祀典光啟王封肇開人思召樹
俗畏軒臺洪惟我后積仁累慶運啟再造功宣二聖金
鏡在握璿璣以正陰陽既和人神交應時災有數孰克
違斯靈命自天疇能問之盜兵竊發玄貺冥期風雲鼓
蕩氣勵殲夷蔣侯助順霍山啟道早聽匪遠誠明則到

上曰欽哉享茲昭告帝服加尊大名紀號多壘既平連
營既寧奕奕新廟崇崇百城民罔疵癘年斯順成庭有
脩物時殷頌聲禍福何常惟人所擇棄信毀義恃衆與
力上帝不蠲明神是殛勒石巖祠敢告萬國

重修筠州祈仙觀記

筠州祈仙觀者東晉黃真君上升之地因為道館綿歷
代祀互有增修國朝保大中元宗皇帝奉為吳讓皇再
加營御名上金石具刻此不脩書夫言意假象故立朝修之
所形器有壞故資繕完之工此觀當荆楚之要津寶郵
傳之便道過賓稅駕遊子解裝幢幢往來罕或虛月必

葺之後二紀有餘閑闕垣墉頽落且半道士羅自正搃
攝真侶啟煥玄風以為道由人弘德以勤繼不下飾不美
人其謂何于是心謀躬行節用畜力授其徒之可任者
會其士之好道者月省歲計經之營之即舊謀新興廢
補闕十有餘歲其績大成允建聖祖殿黃真君殿各一
區峙瑤壇範洪鐘造橫橋於通津植茂樹而蔽野其修
舊整壞者層樓重廊二十餘間其取材也時其擇匠也
良程之以壯督之以固瓴甃瑛碱尚其密藻繪丹雘尚
其麗帑廩不費工庸不勞煥然新宮峙此靈境君子是
以知其能也夫神仙之事史臣不論豈不以度越常均

非擬議所及故邪仲尼書日食星殞皆略其微而著其
顯慮學者之致惑也又况於希夷恍惚之際乎然而載
籍之間微旨可得書云三后在天詩云萬壽無疆斯皆
輕舉長生之明効也及周漢而降則事迹彰灼耳目不
誣天人交感民信之矣于是通儒洪筆始著于篇至如
許君黃君通幽洞冥窮神極妙逮爾姻族與夫家人乘
景上躋超然絕俗故墟舊井真氣裴回至其鄉而思其
人仰其道而踐其迹斯觀之盛豈徒然哉鉉頃歲扈從
南巡有事于游帷之觀二宮相距兩舍而遙使指有程
瞻望弗及逮今一紀無日忘之會羅君狀其功績圖其

形勝見託記述欣然而書開寶七年九月二十四日記
筠州清江縣重修三清觀記

元氣既判天地乃位氣之清明靈粹者鍾乎洞天福地
名山大川之間真聖之所居也景福之所興也然則游
居走望乃建道館焉通都大邑徃徃而在豫章之地實
曰粵區帶豫章之通川據西山之雄鎮鬱映磅礴神異
所栖高真十二震耀方夏萬靈軌轍靡迤蟬聯保大庚
成歲詔復高安縣為筠州析其北鄙為清江縣而三清
觀負新邑之左瞰長江之濱形勝高竒壇宇嚴淨聞諸
故老云昔吳許二君嘗遊茲地夜覩青氣上屬于天相

與嘆曰此非凡地當為神仙之宅及二君登晨之後邑
人追感前言共今上御名茅茨歲時荐獻眾目為草堂道院函

闕紫氣事往名存盤屋草樓人非郭是年世彌遠增修
益崇開成中始詔賜號三清之觀自時厥後又踰十紀
運逢治亂道有汙隆中興已還百度咸復官得其守人
盡其能道士吳宗元允迪玄風克堪道任以為朝禮之
域飈歛所臨不飾不美眾將安仰於是月考歲計庀工
飭材補廢扶傾無所不至建三清之殿造虛皇之臺設
待賓之區敞餘賢之室範華鍾之鑑今上御名層樓之茗亭
回廊復道重深奧秘于是飾儀衛脩器用肅然必洽煥

道下引宋抄錄

關之十條子

焉可觀夫其誠至者其禮修其守固者其事舉道下關

徐公文集卷第十



徐公文集卷第十

